

मार्निंग डोगरी न्यूज़ बुलेटिन, समें. 09.20 Hrs

<><><><><><>

Headlines

- उपराज्यपाल मनोज सिन्हा होरें आखेआ ऐ जे पाकिस्तान प्रायोजित आतंकवाद करी जम्मू-कश्मीर दे लोकें गी जेड़ा कैहर झल्लना पेआ, उसी बयान करना मुश्कल ऐ। एल.जी होरें आतंकवाद दे शकार लोके दे 80 आश्रतें गी नियुक्ति पत्र सौंपे।
- एल.जी होरें आई.आई.टी थमां पढ़ाई करने आहले विद्यार्थिएं दी तकनीकी स्टार्टअप्स, आर्टिफिशल इंटेलीजेंस ते अंतरिक्ष क्षेत्र च मती शमूलियत पर जोर दिता।
- मुखमंत्री उमर अब्दुल्ला होरें आखेआ जे बड़डे जाने आहले इक्क बूहटे दे बदले च 100 नमें बूहटे लाए जाने लोड़चदे ते इयें हर विकास कम्मै दा आधार होना लोड़चदा।
- सूचना ते प्रौद्योगिकी मंत्री सतीश शर्मा होरें जम्मू-कश्मीर च विज्ञान, प्रौद्योगिकी ते नवाचार बारै इक कार्यक्रम दा उद्घाटन कीता।
- ते राष्ट्रीय शिक्षा नीति-2020 दे अज्ज 5 बरें पूरे होआ रदे'न।

<><><><><><>

LG-Appointment Letters

उपराज्यपाल मनोज सिन्हा होरें आतंकवाद थमां प्रभावित लोकें दे परोआर आहलें गी कल जम्मू च नियुक्ति पत्र सौंपे। कार्यक्रम गी संबोधित करदे होई उपराज्यपाल होरें गलाया जे जम्मू-कश्मीर दे आम लोकें पाकिस्तान आसेआ प्रायोजित आतंकवाद दा कैहर झल्लेआ ऐ।

उनें आखेआ जे आतंकवाद पीड़ित परोआरें दे दुख तकलीफें गी लम्मे चिरें तगर नजरंदाज कीता गेआ। उनें गलाया।

इस मौके पर एल.जी होरें आतंकवाद दे शकार लोके दे 80 परोआरें दे इक-इक सदस्य गी नियुक्ति पत्र बंडे। इस्सै चाल्ली बारामूला च बी इयै नेहा ऐतिहासिक कार्यक्रम पैहले आयोजित कीता गेदा हा, जेदे च आतंकवाद थमां प्रभावित 40 परोआरें दे इक-इक सदस्य गी नियुक्ति पत्र सौंपे गए।

<><><><><><>

LG-IIT

उपराज्यपाल मनोज सिन्हा होरें आखेआ जे उर्जा ते पर्यावरण नेह महत्वपूर्ण क्षेत्र न जिंदे च आई.आई.टी इंजीनियरिंग दे विद्यार्थी अगुवाह बनी सकदे न। उपराज्यपाल होरें टेक स्टार्टअप, आर्टिफिशल इंटेलीजेंस ते स्पेस सैक्टरें च 117 विद्यार्थियें दी हिस्सेदारी गी बधाने पर जोर दितां उनें एह गल्ल आई.आई.टी जम्मू च बी.टेक, एम.टेक, पी.एच.डी ते एम.एस.सी विद्यार्थियें दा स्वागत करने लेई उद्घाटन समारोह नवारम्भ गी संबोधित करदे होई आकखी। अपने संबोधन च उपराज्यपाल होरें आई.आई.टी संस्थानें दी सराहना कीती जेड़े राश्ट्र निर्माण च तकनीकी दे कन्नोकन्नी समर्थ गी बधाने च अनमुल्ला योगदान दिंदे न। उनें अगगे आखेआं

<><><><><><>

LG-Archers Delegation

राश्ट्री सतह दे तीरंदाजें दे इक प्रतिनिधिमंडल नै उपराज्यपाल मनोज सिन्हा हुंदे कन्नै मलाटी कीती। प्रतिनिधिमंडल च तीरंदाज ऋतिक शर्मा, शुभम शर्मा ते अमित ठाकुर बी शामिल हे।

उन्दे कन्नै राश्ट्रीय तीरंदाजी टीम दियां कोच अभिलाषा चौधरी बी मौजूद हियां। प्रतिनिधिमंडल दे सदस्ये जम्मू-कश्मीर च तीरंदाजी सने होरनें खेड़ें दे लगातार प्रोत्साहन ते समर्थन लेई उपराज्यपाल हुंदा आभार जताया। एल.जी होरें तीरंदाजा दधतिक शर्मा होरें गी हाल च गै जर्मनी च खेड़्ही गेदी FISU World University Games-2025 च चांदी दा तगमा जितने लेई मुबारकबाद बी दिती। उनें सब्बनें तीरंदाजे गी औने आहली खेड़ें लेई शुभकामनां दितियां ते प्रशासन आसेआ पूरा-पूरा समर्थन देने दा भरोसा बी जताया।

<><><><><><>

CM-Van Mahotsav

मुख्यमंत्री उमर अब्दुल्ला होरें आखेआ ऐ जे विकास इक जरूरत ऐ, बर्शते एह समझदारी कन्ने कीता ज। उनें मिसाल दिंदे होई आखेआ जेकर इक बूहटा पुट्टेआ जा ते औहदी थाहरै पर 100 बूहटे लाना लोड़चदा ऐ। मुख्यमंत्री होरें एह गल्ल जम्मू दे अभिनव थियेटर च जंगलात मैहकमे आसेआ आयोजित वन महोत्सव 2025 दा उद्घाटन करदे होई आकखी। मुख्यमंत्री होरें आखेआ जे जलवायु परिवर्तन दे सब्बै संकेत स्हाड़े आले-दोआले दिक्खने गी लब्बदे न ते असेंगी लोड़चदा ऐ जे इस धरती ते पर्यावरण दा संरक्षण करचै। एह स्हाड़ी विरासत न स्हाड़ी एह जिम्मेदारी बनदी ऐ जे अस इनेंगी अगली पीढ़ियें तगर सुरक्षित पजाचै। इस मौके पर बोलदे होई मुख्यमंत्री होरें आखेआ।

कार्जक्रम च समूलचे जम्मू-कश्मीर थमां जनजातीय समुदाय दे लोके, विद्यार्थिये ते मकामी लोके बड़ी बद्द गिनतरी च हिस्सा लैता।

<><><><><><>

Announcement

आकाशवाणी दा क्षेत्रीय समाचार एकांश जम्मू “स्वच्छ सर्वेक्षण” बारै 30एं मिनटे दा इक विशेष कार्जक्रम प्रसारित करने जा'रदा ऐ जेहड़ा तुस अज्ज दपैह्री साइडे 12 बजे सुनी सकदे हो। कार्जक्रम च स्हाड़े मेहमान होडन जम्मू नगर-निगम दे कमिशनर देवांश यादव, जेहड़े इस विषय पर अपने विचार ते जानकारी श्रोताएं कन्नै सांझी करडन। उन्दे कन्नै गल्लबात करडन स्हाड़े न्यूज एंकर विजय बजाज ते में अभिलाषा शर्मा। चेता रखेयो स्वच्छ सर्वेक्षण बारै एह विशेष कार्जक्रम अज्ज दपैह्री साइडे 12 बजे स्हाड़े इस्सै चैनल पर प्रसारत कीता जाहग।

<><><><><><>

Satish-STI

सूचना टेकनालजी मंत्री सतीश शर्मा होरें कल आई.आई.टी जम्मू च विज्ञान, प्रोद्योगिकी ते नवाचार बारै बड़े हितधारके दे सम्मेलन दा उद्घाटन कीता। इस आयोजन दा सरिस्ता जम्मू-कश्मीर विज्ञान टेकनालजी ते नवाचार परिषद ते विज्ञान टेकनालजी कलस्टर दे उत्तरी क्षेत्र PM-RAHI आसेआ मिलियै कीता गेआ जेदे नै सरकार, उद्योगिक क्षेत्र ते शिक्षण दे कन्नो-कन्नी केई स्टार्ट अप्स गी इक्के मंच पर आहनने दी कोश्ट कीती गई।

इस मौके पर मंत्री होरें केंद्र शासित प्रदेश च नमिएं काहडें ते अनुसंधान दी अजमैश परीक्षण गिते त्रै महत्वकांक्षी पैहलकदमिएं दी बी शुरूआत कीती गई जिंदे च उत्तरी भारत च जमीनी सतह पर नमिएं काहडें गी बढ़ावा देने सरबन्धी कार्यक्रम GINI ते जम्मू-कश्मीर च अनुसंधान ते ज्ञान सरबन्धी कम्में गी रफ्तार देने सरबन्धी कार्यक्रम SPARK-J&K बी शामिल ऐ।

<><><><><><>

NEP-5 years

राष्ट्री शिक्षा नीति 2020 गी अज्ज 5 बरें पूरे होआरदे न। एह शिक्षा नीति भारत दे सब्भनैं स्कूलें गी ज्ञान हासल करने दे ऐसे केंद्रें दे रूपै च बदलने दी योजना ऐ जित्थे शिक्षा यानि तालीम छड़ी कताबें, नम्बरें ते जानकारी गी रटने तगर गै सीमित नेही रवै, सगुआं विद्यार्थी स्कूलें च पढ़ाए जाने आहली पढ़ाई, इक-इक अक्खर ते ज्ञान कन्नै अपने जीवन गी लैस करन ते पूरी चाल्ली सक्षम ते ज्ञानवान बनी सकन। स्टाइ संवाददाता नै जानकारी दिती ऐ जे पिछले 5एं बरें च इस नीति तैहत मुख्य ध्यान शिक्षा बवस्था दा मुंड तैयार करने पर दिता गेआ ऐ जेदे नै शिक्षा मती समावेशी, विद्यार्थी केंद्रित यानि विद्यार्थीएं दी समर्थ ते जरूरतें मताबक ते भविक्ख च कम्म औने आहली इक कीमती सरमाया बनी सकै। राष्ट्रीय शिक्षा नीति 2020 दा असर कई असरदार सुधारें दी मदद कन्नै हर पास्से नजरी आवा करदा ऐ। एहदे तैहत निपुण भारत ते विद्या प्रवेश जनेइएं पैहलकदमिएं दी मदद कन्नै देसै दे 8 लक्ख 90 जहार स्कूलें च 4 करोड़ 20 लक्ख विद्यार्थीएं गी फैयदा पुज्जा ऐ।

<><><><><><>

Amaranth-Yatra

अमरनाथें दी जातरा रमानदारी आहले ढंग्गै सिर जारी ऐ। सख्त सुरक्षा बंदोबस्तें हेठ जम्मू दे भगवती नगर आहले आधार शिविर थमां 1 जहार 490 श्रद्धालुएं दा जत्था 61 गइडिं दे काफले च अज्ज बड्डलै जातरा आस्तै घाटी लेई रवाना होआ। इस जत्थे च 1 जहार 262 मर्द, 186 महिलां, 42 साधु ते साध्वियां शामिल हियां। इन्दे चा 327 श्रद्धालु बालटाल लेई ते 1 जहार 163 श्रद्धालु पहलगाम लेई रवाना होए जिथुआं ओह पवित्तर गुफा लेई अपनी जातरा शुरू करडन।

<><><><><><>

Dy CM Public Darbar

उपमुख्यमंत्री सुरेंद्र चौधरी होरें राजौरी जिले च नौशेरा दे राजपुरा कमिला ते अंधरूट ग्राएं च लोकें दी शकैतें दा हल कइडने लेई जनता दरबार लोआया। इस मौके पर बक्ख-बक्ख बुनियादी जरूरतें थमां लेइयै बुनियादी ढांचे ते विकास तगर दे मुद्दें गी उजागर कीता गेआ। उपमुख्यमंत्री होरें सब्बन दे मसलें गी सुनेआ ते तौले नबेड़े दा भरोसा बी दोआया। उनें आखेआ जे सरकार दा धेइया समावेशी विकास दा ऐ जेड़ा जम्मू-कश्मीर दी हर इक नुक्कर तोड़ी पुज्जी सकै। इस मौके पर उपमुख्यमंत्री होरें अंदरूट च ब्लाक जनसेहत इकाई लेई नीह पत्थर बी रक्खेआ ते आखेआ।

<><><><><><>

Announcement

आकाशवाणी दा क्षेत्रीय समाचार एकांश जम्मू 'ऑस्टियो पोरोसिस' बारै 15एं मिनटें दी इक विशेष परिचर्चा प्रसारित करने जा'रदा ऐ। एह् इक ऐसी बमारी ऐ जेदे नै माहनू दियां हड्डियां कमजोर होना शुरू होई जंदियां न। एह् कार्यक्रम कल बुधवारें 30 जुलाई गी बड्डलै पौने 9 बजे प्रसारित कीता जाग जेदे च स्हाड़े मेहमान होडन जम्मू मेडिकल कॉलेज दे हड्डी रोग विभाग दे एसोसिएट प्रो. डॉ. बियास देव जेड़े इस बारी बारै अपने विचार, एहदे कारण, बचाव ते इलाज बारै जानकारी श्रोताएं कन्नै सांझी करडन। इन्दे नै गल्लबात करडन जगमोहन शर्मा।

<><><><><><>